

MM. Gast Gibéryen, Jacques-Yves Henckes, Jean-Pierre Koepp (par M. Gast Gibéryen) et Robert Mehlen;

M. Aly Jaerling.

Gëtt d'Chamber d'Dispens vum zweete Vote constitutionnel?

(Assentiment)

Dann ass et esou décidéiert.

Motion 1

Mir hunn nach d'Motioun, déi vum honora-belen Här Kox déposéiert ginn ass. Ass de Vote électronique verlaangt?

(Brouhaha général)

Den Här Schaaf huet d'Wuert.

» **M. Jean-Paul Schaaf** (CSV), *rapporteur*.- Ech wollt just proposéieren, bei deem zweeten Tiret ënner „invite le Gouvernement“ éischstens emol hanner „Union“ dat Wuert „européenne“ derbäizesetzen an dann awer „et associations plus critiques“ ewechzeloossen. An da mengen ech, géife mir deen Text op alle Fall verstoen als eng Confirmation vun där gudder Regierungs-aarbecht, déi mer selbstverständlech och kënne matstëmmen.

» **Plusieurs voix**.- Oh!

(Hilarité)

» **M. Henri Kox** (DÉI GRÉNG), *auteur-rapporteur*.- Ech deelen natierlech de Gros vun Ären Äusserungen an ënnerstëtzen d'Regierung bei hirer gudder Aarbecht an dësem Dossier weiderhin. Merci.

» **Plusieurs voix**.- Ah!

» **Une voix**.- Très bien.

Motion 1 modifiée

La Chambre des Députés,

- *considérant que la culture d'OGM implique des risques peu ou pas calculables et aux conséquences irréversibles - notamment de contamination génétique - pour l'environnement, l'apiculture et les agricul-tures conventionnelle et biologique;*

- *convaincue que le projet de loi N°5380 sur la commercialisation des semences et plants ainsi que sur la coexistence des cul-tures génétiquement modifiées, convention-nelles et biologiques mettra en œuvre un cadre précis et contraignant pour la mise en culture d'OGM au Luxembourg;*

- *rappelant que la variété de maïs transgé-nique MON 810 est actuellement autorisée à la culture sur l'ensemble du territoire de l'Union européenne;*

- *insistant sur le fait qu'il n'existe aucune étude à long terme sur les effets indirects de la toxine Bt produite par ce maïs et no-tamment sur les organismes non ciblés (écosystème aquatique, insectes du sol, papillons, etc.) ainsi que sur la résistance potentielle que pourrait développer l'insecte cible, la pyrale du maïs;*

- *rappelant qu'il existe suffisamment d'élé-ments scientifiques pour amener l'Autriche à interdire le MON 810 en 1998, rejointe par la Grèce et l'Hongrie en 2005, par la Po-logne en 2006 et tout récemment par la France;*

invite le Gouvernement

- *à maintenir et promouvoir le principe de précaution en matière d'autorisation de se-mences et plants génétiquement modifiés, aussi bien au niveau national qu'au niveau européen;*

- *à intensifier sa collaboration avec les autres gouvernements de l'Union euro-péenne et les autres autorités face aux pos-sibles conséquences négatives de l'utilisa-tion de plants et semences génétiquement modifiés.*

(s.) *Henri Kox, Claude Adam, Félix Braz, Camille Gira, Jean Huss.*

» **M. le Président**.- Ech géif den Här Schaaf bieten, dem Greffe déi Proposition de texte eranzeginn, net dass mer herno erëm musse rätselen, wou wat bäigesat gëtt.

Kënne mer par main levée ofstëmmen iw-wert déi Motioun?

(Assentiment)

Vote

Wie fir d'Motioun 1 ass, ass gebieden d'Hand an d'Luucht ze hiewen.

Wien ass dergéint?

Déi modifiéiert Motioun ass eestëmmeg ugeholl.

Mir fueren da weider mat der Debatt, déi mer amgaange waren. D'Wuert huet elo déi honorabel Madame Claudia Dall'Agnol.



6. 5748 - Projet de loi ayant pour objet d'autoriser le Gouvernement à subventionner l'exécution d'un huitième programme quinquennal d'équipement de l'infrastructure touristique (suite)

Discussion générale (suite)

» **Mme Claudia Dall'Agnol** (LSAP).- Merci, Här President. Dir Dammen an Dir Härën, Här Minister, léif Kolleeгинnen a Kol-leegen, ech si frou, dass elo eng kleng Paus dertëschent war an d'Gemidder sech erëm berouegt hunn nom Vote, well et wier ganz schwéier gewiescht, nom Här Etgen ze schwätzen.

(Interruptions)

» **M. le Président**.- Här Bettel, Dir kënnt et bal net wëssen, well Dir waart déi meeschten Zäit um Téléphone.

(Interruption)

Jo, um Handy.

(Interruptions et hilarité)

» **Mme Claudia Dall'Agnol** (LSAP).- Jo, Här President, ech hat gemengt, ech ganz eleng hätt elo hei d'Wuert?

» **M. le Président**.- Madame Dall'Agnol, Dir hutt d'Wuert.

» **Mme Claudia Dall'Agnol** (LSAP).- Här President, d'Chamber hat sech jo am Kader vun enger Interpellatioun am Juni 2006 schonn eng Kéier méi intensiv mat der Tourismuspolitik hei zu Lëtzebuerg be-faasst. Haut steet dann am Fong net eng all-gemeng Diskussioun iwwert den Tourismus op eisem Ordre du jour, mä e ganz konkrete Gesetzesprojet, mat deem d'Regierung vun der Chamber soll autoriséiert ginn, fir den aachte Fënnefjoresplang fir d'Verbesserung vun der Tourismusinfrastruktur ze subven-tionéieren.

An awer, dee Programme quinquennal kann natierlech net lassgeloist vun der gesamter Tourismuspolitik hei am Land gekuckt ginn, an duerfir ass et noutwendeg, dee Projet de loi, dee mer haut wäerte stëmmen, an ee méi breede Kontext vun eiser Tourismus-politik ze setzen.

Ech wëll awer trotzdeem der Rei no fueren a fir d'éischt e puer Bemierkungen zum Fën-neffjoresplang selwer maachen, ier ech dann e puer Iwwerleeungen zur Ausriich-tung an zum Fonctionnement vum Touris-mussecteur hei am Land wëll virdroen.

Vläicht kuerz nach eng Kéier fir ze résu-méieren: Den aachte Fënnefjoresplang fir d'Verbesserung vun der Infrastruktur am Tourismussektor leeft vun 2008 bis Enn 2012. De Programm ass mat engem Ge-sambudget vun eppes méi wéi 50 Millioun Euro dotéiert. Dat sinn nominal ronn een Drëttel méi, wéi am siwente Programm age-schriwwe waren.

Am Artikel 1 gëtt opgezielt, wat fir Zorte vu Projeten éligibel sinn, fir eng Subventioun vum Stat ze kréien. Ech ziele se elo net all nach eng Kéier op. Ech weise just dorop hin, dass vis-à-vis vum siwente Programm d'Méiglechkeet bäikomm ass, fir Subven-tioune beim Ministère unzefroe fir Zertifika-tiounsprogrammer, déi mat engem Quali-téitslabel sanktionéiert ginn.

Erlaabt mer vläicht an deem Kontext och drop hinzewiesen, dass den Intitulé vum Gesetzesprojet nach ëmmer vun engem Programm am Interesse vun den touriste-schen Infrastruktur schwätzt. An der Të-schenzäit ass et awer esou, dass iwwert de Wee vun de Fënnefjorespläng net méi eleng d'Infrastrukturen ënnerstëtzt ginn, mä och Fonctionnementskäschten a Frais-d'étuden iwwerholl ginn. Dat just fir ze soen, dass dee Plang mat der Zäit iwwer säin initialen Ob-jektiv eraus evoluéiert huet an den Touris-mussecteur domat och ëmmer méi breet of-deckt.

Fënnefjorespläng fir den Tourismus, déi et iwwregens zënter 1973 gëtt, hu mat Sécher-heet vill dozou bäigedroen, déi touristesch Infrastruktur hei am Land ze entwéckelen an och op en internationale Standard ze hie-wen. Dat seet net nëmmen den zoustän-nege Minister; dat gëtt och vun onofhänge-ge Säit - zum Beispill vun Europäeschen Tourismus Institut zu Tréier - unerkant. Ech mengen, mir kënnen eis och alleguerte sel-wer dovunner iwwerzeegen, wann ee ron-derëm am Ländchen ëm sech kuckt.

Mä, Här President, et ass trotzdeem net alles Gold, wat blénkt. Ech hunn als Prepa-ratioun fir meng Ried nach eng Kéier de

Rapport spécial vun der Cour des Comptes vun 2005 iwwert d'Exekutioun vum sechsten a siwente Programme quinquennal nogelies an och d'Konklusiounen, déi d'Comexbu an hirem Rapport vum Januar 2006 dozou zrëckbehalen huet.

D'Cour hat do trotz allem eng Rei seriö Froen opgeworf an eng Rei kritesch Bemier-kungen zur Exekutioun vun de genannte Programmer gemaach, déi deemools am Kader vun der Procédure contradictoire vum Minister deelweis réfutéiert, deelweis awer och confirméiert gi sinn, a wou de Mi-nister versprach hat, dass och do géif Re-medur geschafe ginn. Do waren notamment d'Prozeduren an och d'Kritäre vun der Allo-catioun vu Subside viséiert.

Eng weider Kritik huet d'Lëscht vun de Pro-jete beträff, déi am Laf vun der Fënnefjores-period sollten ënnerstëtzt ginn. D'Cour hat deemools festgestallt, dass vun de 57 Pro-jeten, déi am sechste Programm age-schriwwe waren, der 25 net réaliséiert gi sinn. Dat entsprécht engem Taux de non-réalisation vu ronn 44%; wat jo awer trotz-deem e ganz héijen Taux ass.

Natierlech ass et net esou, dass all Projet, deen op déi Lëscht kënnt, onbedéngt muss réaliséiert ginn, mä d'Cour huet awer - a mir fannen, ganz zu Recht - ze bedenke ginn, dass eventuell aner Projeten net berück-sichtegt gi sinn, well se net prioritär waren, fir herno ebe festzustellen, dass vun deene Projeten, déi als prioritär ugesi gi sinn, bal d'Halschent awer net konnt ëmgesat ginn.

D'Cour des Comptes schreift dann och an hirem Rapport - an ech zitéieren -: «Aussi la Cour propose-t-elle que dans d'éventuels prochains programmes quinquennaux les projets à réaliser et les résultats à obtenir soient davantage à exprimer sous forme d'objectifs à atteindre plus clairs et plus pré-cis avec les incidences financières respec-tives.» Fin de citation. Dat bedeit an der Konsequenz och, dass nëmmen nach Pro-jete géifen op déi Lëscht kommen, déi schonn an hirer Planung wäit genuch fort-geschratt wären, fir eben an deem Zäitraum vu fënnef Joer kënnen ëmgesat ze ginn.

(Mme Colette Flesch prend la Prési-dence)

Ausserdeem - an do zitéieren ech dann nach eng Kéier aus dem Rapport spécial vun der Cour, well ech et och eigentlech net besser ausdrécke kéint, wéi si et gemaach hunn - geet et och ëm méi Transparenz a besser Kontrollméiglechkeeten duerch eng méi prezis Budgetisatioun. D'Cour schreift hei: «La Cour donne à considérer qu'il im-porte de disposer d'une répartition quin-quennale de l'enveloppe financière par genre de projet ainsi que des dépenses im-putées sur chacun des projets en la ma-tière. Pareille organisation à mettre au point au niveau du contrôle interne devrait per-mettre d'assurer ultérieurement le contrôle des aides d'État financées par l'intermé-diaire du Fonds.» Mat „Fonds“ ass natier-lech de Fonds pour la promotion touristique gemengt.

Ech wär frou, wann d'Chamber vum Minister géif Opschloss doriwwer kréien, wat sech an der Gestiou vum siwente Programme quinquennal zënter deem Rapport vun der Cour des Comptes verbessert huet, ob déi Prozeduren a Kritären, déi de Minister dee-mools versprach hat schréfflech ze fixéie-ren, mëttlerweil existéieren, an ob sech de Minister un deene Recommandatiounen, déi d'Cour deemools ausgesprach hat, inspiréiert huet fir d'Opstelle vun deem Plang, dee mer haut wäerte stëmmen.

(Interruption)

» **M. Fernand Boden**, *Ministre des Classes moyennes, du Tourisme et du Lo-gement*.- Ech wëllt direkt drop äntworten.

» **Mme le Président**.- Jo, sécher.

» **M. Fernand Boden**, *Ministre des Classes moyennes, du Tourisme et du Lo-gement*.- D'Madame Dall'Agnol zitéiert elo ëmmer de Rapport vun der Cour. Se huet awer gesot, duerno wier ee Contradictoire gewiescht, wou de Minister dozou Stellung bezunn huet. Et ass finalement e Rapport komm vun der Comexbu.

» **Mme Claudia Dall'Agnol** (LSAP).- Dat hunn ech jo och gesot.

» **M. Fernand Boden**, *Ministre des Classes moyennes, du Tourisme et du Lo-gement*.- Jo, mä Dir zitéiert awer net dat. Well do ass gesot ginn, dass am siwente Programm schonn dat Wesentlechst redres-séiert gi wär vun deem, wat am sechste re-prochéiert gi wär.

» **Mme Claudia Dall'Agnol** (LSAP).- Dat hutt Dir jo dann nogeholl.

» **M. Fernand Boden**, *Ministre des Classes moyennes, du Tourisme et du Lo-gement*.- Jo, mä Dir musst jo och dann dat Richtegt soen. Soit.

» **Mme Claudia Dall'Agnol** (LSAP).- Schliesslech wëilt ech awer och nach drop hiweisen, dass eng Rei vu Projeten, déi vum Tourismusministère kënnen ënnerstëtzt ginn, à cheval sinn; dat heescht tëschent dem Tourismusministère engersäits, an zum Beispill dem Sportsministère oder dem Landschaftsministère anerersäits. Esou gesäit och zum Beispill dat neit Agrargesetz d'Méiglechkeet vir, fir de ländlechen Touris-mus ze förderen. Ech froe mech respektiv de Minister, wéi de méigleche Cumul vun esou Subsiden aus verschiddene Keese gehandhaabt gëtt. Gëtt et do Anticumul-bestëmmungen? Gëtt et do eng Koordina-tioun tëschent deenen eenzelnen impli-zéierte Ministèren? Oder ginn déi Aidë ganz onofhängeg dovunner octroyéiert?

» **M. Fernand Boden**, *Ministre des Classes moyennes, du Tourisme et du Lo-gement*.- Madame Dall'Agnol, dat do gëtt et. Ech hu schonn an de Kommissiounen erklärt, wéi dat fonctionnéiert. Et steet och schonn am leschten Agrargesetz esou dran. Duerfir verstinn ech déi Remarque am Fong net.

» **Mme Claudia Dall'Agnol** (LSAP).- Da maacht et nach eng Kéier, fir dass och de Grand public, deen lech elo herno wäert nolauschteren, weess, wéi dat gehand-haabt gëtt.

» **M. Fernand Boden**, *Ministre des Classes moyennes, du Tourisme et du Lo-gement*.- Ech soen et elo net. Ech hunn et schonn oft genuch gesot.

(Interruption)

» **Mme le Président**.- D'Madame Dall'Agnol huet d'Wuert.

» **Mme Claudia Dall'Agnol** (LSAP).- Merci, Madame Presidentin.

Madame Presidentin, Kolleeгинnen a Kol-leegen, Här Minister, esou vill zum Geset-zesprojet iwwert den aachte Programme quinquennal. Ech hat jo schonn a menger Introduktioun gesot, dass een dee Plang awer trotz allem net kéint isoléiert kucken, mä dass e sech an eis national Tourismus-politik aschreift. Duerfir wëilt ech dann hei och kuerz eng Kéier eng Rei Froen opwer-fen, déi eis Tourismusstrategie am Allge-menge betreffen an déi en Impakt op d'Va-lorisatioun vun den Infrastrukturen hunn, déi mer mat Hëllef vun de successive Fënnef-joresprogrammer jo opgeriicht hunn.

Et geet am Tourismussektor, genau wéi an deenen anere Wirtschaftssectoren, net duer, dass ee gutt Infrastructure bereetstellt an dass duerno alles ganz vun eleng rullt, mä och a besonnesch an deem menger Meenung no héich konkurrenzuellen Touris-mussecteur muss ee permanent investéie-ren, innovéieren an awer och animéieren, wann een als Tourismusdestination den Uschloss net verpasse wëllt.

Am Rapport d'activité vum Tourismusminis-tère - an dann zitéieren ech dorauser - fir d'Joer 2006 steet e Saz, dee ganz richtig ass: «S'il est vrai que la meilleure promotion touristique se situe en porte-à-faux par rap-port à la réalité quand elle ne peut s'ap-puyer sur des infrastructures et des équipe-ments valables, la politique d'investisse-ment la mieux intentionnée se révèle inopé-rante si elle n'est pas valorisée par la créa-tion d'une image de marque appropriée.» Domat ass eng vun den zentralen Eraus-fuerderunge vun eiser Tourismuspolitik uge-schwat, nämlech d'Fro, wéi mer eist Land als attraktiv Tourismusdestination verkafe(n, nach besser kënne verkafe(n, haaptsäch-lech am Ausland, mä awer och heiheem.

Wéi verkafe mer eis also? Op der Vakanze-foire ass mir perséinlech opgefall, dass aus dem noe Grenzgebitt, aus Rheinland-Pfalz, dem Saarland, der Lorraine, dem Elsass, natierlech der Belsch vun den Ardenen bis un d'Côte vill Regiounen fir sech Promotioun gemaach hunn. Vill Privatbetriber haten do och hir Stänn. Op Lëtzebuerger Säit waren awer haaptsächlech Touopérateurë pre-sent.

Ech stelle mer d’Fro, wéi d’Zukunft vun där Foire ausgesäit an ob se eigentlech och esou konzipéiert ass, dass se dem sougenannten Inlandtourismus eppes ka bréngen. Firwat profitéieren eis Lëtzebuenger Tourismussyndikater an -ententen net, fir hir Regioun mat all hiren Atouten hei de Lëtzebuenger Clienten ze weisen, déi jo awer massiv dohinner ginn? Dat wär vläicht genausou wichteg, wéi op enger Foire - kommt, mir huelen eng eraus, déi am Rapport zitéiert war - zu Berlin vertraueden ze sinn.

» **Une voix.** - Et waren der eng Partie do.

» **Mme Claudia Dall’Agnol (LSAP).** - Jo, eng Partie waren der do.

» **La même voix.** - Um Stand vum ONT waren der eng ganz Partie do.

» **Mme Claudia Dall’Agnol (LSAP).** - Dat stëmmt.

Wat eis Presenz op auslännesche Foirën am Allgemengen ubelaangt, wéisst ech och emol gären, ob een eigentlech den Erfolleg vun der Promotioun vun der Destinatioun Lëtzebuerg Chiffres à l’appui moosse kann? Am Rapport d’activité vum Ministère ass zwar minutiéis opgefouert, op wat fir enger Foire mer waren, wivill Prospekter och do verdeelt goufen, mä doraus léisst sech jo natierlech net erkennen, wivill Leit herno opgrond vun eiser Presenz op där Foire och tatsächlech op Lëtzebuerg komm sinn.

Eng Iddi, déi mer esou direkt afält, wär zum Beispill déi, dass ee kéint higoen an op deene Foirë Bonge verdeelen, déi d’Leit dann op hirer Rees hei zu Lëtzebuerg kéinten aléisen. Doduerch wär et jo och méiglech erauszefannen, wivill Leit vun deenen, déi e Bong kritt hunn, dann och tatsächlech herno op Lëtzebuerg gereest komm sinn. Domat kéinte mer och de Succès vun där respektiver Foire, wou mer present waren, moossen.

Déi vläicht wichtegst Erausfuerverderung vun eisem Tourismussektor ass awer déi vu sengem Opbau a vu senger Strukturen. Wéi ass eise Sektour iwwerhaapt organiséiert? Wa mer elo emol de Privatsektor einfach ausklammere, da gesäit d’Struktur folgendermoossen aus:

Un der Basis hu mer d’Syndicats d’initiative, déi fréier Verschënerungsvereiner, déi haut awer trotzdeem en enorm wirtschaftlechen Impakt hunn. Da kommen d’Ententes des syndicats; dat sinn d’reional Strukturen. Dozou kommen déi nei ORTen; wat och éischter regional Structure sinn. Dann d’LEADER-Regiounen, déi fir hir Projete jo awer enorm Gelder deblockéiere kënnen aus staatlechen, mä awer och aus europäesche Fongen. Wann ech richteg informéiert sinn, sinn dat jee weils nach eng Kéier 40 bis 20% vun de Gemengen. Do drop grefféiert sech den Office national du tourisme. Da kommen d’Auslandsbüroen, an enfin de Ministère, dee sécherlech net genuch Personal huet, fir seng Roll als déi wichtegst Instanz am Tourismussektor effikass ze erfüllen.

Do dernieft intervenéieren dann natierlech och nach déi verschidde Berufsorganisatiounen, wéi d’Vereenegung vun de Campingsbesëtzer an natierlech och dee grouse Verband vun der Horesca. Ech mengen, meng Virriedner haten déi hei schonn eng Kéier all opgezielt.

Dir gesitt also, dass den Tourismussektor parcelliséiert a menger Meenung no och oniwiersichtlech ass. Vill Käch kachen um selwechte Bräi, an der LSAP no gi mer och vill ze vill lues a Richtung vun enger Professionaliséierung vum Sektour touristique. Fir de Moment hu mer eng sëllege Gruppen, wou een deem aneren op d’Plate-banden trëppelt. Déiselwecht Volontären hu verschidden Hitt un a sinn en plus dann nach eng Kéier d’Chef de vum de Profien, déi vum Stat bezuelt ginn. Mir wiere frou, wann de Minister eis op dëser Plaz soe kéint, wéi hien d’Struktur an de Fonctionnement vun eisem Tourismussektor an Zukunft gesäit, zum Beispill d’Verbindung tëschent dem ONT an den Ententen.

Fir ofzeschlësse mengen ech awer soen ze kënnen, dass mer, och wann et vläicht op den éischte Bléck no baussen net esou ausgesäit, genuch touristesch Attraktiounen ze

bidden hunn. Net nëmmen eis Hauptstadt, d’Éislek, de Mëllerdall, d’Musel, mä och eis industriell Vergaangenheet léisst sech weisen. Ech nennen d’Héichiewen, de Musée national des Mines zu Rëmeleng, de Fond-de-Gras, d’Leekaulen, d’Kofferminn an esou weider an esou fort. Dat ass e ganz wäertvolle Patrimoine, deen nëmmen drop waart, fir engem nach méi grouse Publikum zougänglech gemaach ze ginn, an ech mengen, genau dat soll d’iewescht Zil vun enger erfollegräicher Tourismuspolitik fir Lëtzebuerg sinn.

Domat ginn ech den Accord vu menger Fraktioun zu dësem Projet de loi an ech soenlech, Madame Presidentin, Här Minister, Dir Dammen an Dir Hären, Merci fir d’Nolauschteren.

» **Plusieurs voix.** - Très bien!

» **Mme le Président.** - Merci, Madame Dall’Agnol. D’Wuert huet elo den Här Kox.

» **M. Henri Kox (DÉI GRÉNG).** - Madame Presidentin, Dir Dammen an Dir Hären, Här Minister, am Numm vun der grénger Fraktioun wëllt ech dann och fir d’éischt dem Rapporteur - ah, hien ass aus dem Sall de Moment - Merci soe fir säi mëndlechen a schrëftleche Rapport. E Rapport, deen den lwwerbléck iwwert den achte Plan quinquennal vum Tourismusministère mécht. E Plang, deen a sech de Kader fir Investitiounshëllef setzt, deen an den nächste fënnef Joer am Tourismusberäich hei zu Lëtzebuerg ëmgesat gi soll.

Mäi Virgänger an der grénger Fraktioun, dee sech vill an oft mam Tourismus beschäftegt huet, den Här Garcia, huet bei den Debatten iwwert de siwente Plan quinquennal gesot - dëst war awer éischter als Witz geduecht -, déi Pläng wäeren ee vun de leschte Relikter vun der Planwirtschaft aus dem Ostblock. Deemoools war dat awer net esou richteg ukomm, well et jiddefalls zu heiteren Diskussiounen gefouert huet.

Ech wëll déi Diskussiounen hei net erm opwerfen, och mir gesinn et schonn als Virdeel un, dass een e Fënnefjoresplang fir Infrastrukturen an och fir Programmer a Labelen vum Tourismus hei ofvotéiere kann. Mir wäerten dofir och dëse Projet als gréng Fraktioun mat ënnerstëtzen, wëssend, dass mer eis awer vläicht eng aner oder besser gesot eng nei Approche, wat d’Entstoe vun esou engem Plang ugeet, hätte virstelle kënnen.

D’Ëmsetzung vun esou engem Plang kéint ech mer och anescht virstellen. Meng mëttlerweil zweejährig Erfahrung als klenge bescheidene Gemengensektor aus enger méi oder manner bekannter Lëtzebuenger Tourismushéichbuerg weist, dass et awer net esou einfach ass, sech dat néidegt Gehéier ze verschafen, an et och net ëmmer direkt novollzéibar schéngt, wéi a wéini elo eng Infrastruktur ënnerstëtzt gëtt oder net ënnerstëtzt gëtt. Oder besser, aus Siicht vum Ministère gekuckt, mat wéi enger Héicht e Projet schlussendlech subventionéiert gëtt oder net.

De Kader, deen hei deemno mat dësem Plang ëmrass soll ginn, ass herno an der Praxis net méi esou richteg ze gesinn. Mir gesinn dëse Projet dofir eigentlech just als en Instrument vun enger méi konsequenter Tourismuspolitik. An déi konsequent Politik, fanne mir, feelt nach ëmmer oder ass nach ëmmer net richteg op de Schinnen.

Dës Kritik hu mir och scho viru fënnef Joer formuléiert. Déi Kritik ass och haut nach ëmmer gültig. Ech probéieren dat och ganz kuerz op e puer Beispiller ze explizéieren.

Fir d’éischt awer nach e Wuert iwwert déi finanziell Rumm vun dësem achte Plan quinquennal, oder soll ech vläicht éischter soen, de Plein quinquennal? Firwat Plein? Ma et gëtt hei iwwer fënnef Joer e gudd Batz Suen iwwert d’Land verstreut, Suen, mat deenen een deen een oder anere méi oder manner glécklech maache kann. D’Steigerung vum siwenten op den achte Plang ka sech weise loossen. Et ass dat eng Steigerung vu mëttlerweil 34%, gemëttelt, oder et ass dat déi héchste Steigerung vun de leschten dräi Pläng. De siwente Plang hat nach nëmmen eng Steigerung vun 28% an de sechste souguer nëmmen eng vun 11%. Dëst ëmmer verglach zu deene Pläng vu virdrun.

Als absolut Zuel ëmmerhin iwwer 50 Milliounen Euro. Dat si vill Suen, déi do ënnert d’Leit musse bruecht ginn. Suen, déi natierlech hongreg maachen. En Honger, dee bei villen ukënn an dee gestoppt muss ginn. Wann ech mer d’Lëscht vun deene sëllege Projeten ukucken, da fäerten ech awer, dass mer deen décken Honger net wäerte ganz stoppe kënnen. Oder awer et gëtt der eng Rei, déi gutt sat ginn, an anerer, déi weiderhin hongreg op hire Projete setze bleiwe wäerten.

Firwat dës Kritik? Well ech d’Impressioun hunn, dass vill Projeten, déi an deene sëllege Reglementer zrëckzefanne sinn, einfach emol esou dropgesat goufen. Ech sinn net onfrou iwwert d’Tatsaach, dass all Projeten, déi mir als Réimecher Gemeng eragereecht hunn, och op iergendenger Lëscht zrëckzefanne sinn. Ech sinn och frou, de Projet iwwert de Vélo, dee mir als Gemeng eragereecht hunn, ermfonnt ze hunn, well besonnesch laanscht d’Musel - an dat ass scho virdrun ugeschwat ginn - am Vélos-tourismus nach villes ënnerholl gi muss, wann op der Musel esou e Vélosverleih a Kombinatioun mat der Schëfffahrt, wéi zum Beispill d’Marie-Astrid, kéint realiséiert ginn; wat e ganz positiven Impakt op den Tourismus hätt!

Ech ka mer gutt virstellen, dass esou Vélos-systemer, esou wéi dat zu Esch oder och nach an der Stad ass - esou wéi deen, deen elo gëschter virgestallt gouf -, laanscht d’Musel duerchaus exzellent fonctionnéiere kéinten. Wann aner Gemengen awer ähnlech virgaange sinn, an dat schéngt och esou de Fall ze sinn, ass et wuel eng Politik, déi vun ënnen no uewe gestéiert schéngt ze sinn, mä eng grouss Kohärenz vun enger geplangter Touristepolitik ass dat net. Ech ka mech jiddefalls net erënnere, a wéi engem Gremium ech als Gemengevertreter als Demandeur vun esou Projeten oder als Verrieder och aus enger Touristekommissioun sollt derbäi gewiescht sinn, wou dat hätt kënnen diskutéiert ginn.

Et ass do, wou mir mengen, dass eng méi konsequent Touristepolitik muss ugesat ginn. Dëst awer net grad ëm fënnef vir zwielef, ier zum Beispill en neie Plan quinquennal gestëmmt gëtt, mä dëst muss laang virdru geschéien. Dëst setzt natierlech och viraus, dass méi an engem regionale Gedanken d’Touristepolitik geplangt muss ginn, an dann ass et natierlech eriwier mat där sougenannter Kierchtuermspolitik.

Dorunner ass de Minister net eleng schold. D’Responsabilitéit läit och do bei deene sëllege Lokalpolitiker. De Minister misst awer da méi eng aktiv Roll um Niveau vun der Koordinatioun iwwerhuelen, fir bei der Zesummenaarbecht och als Katalysator kënnen ze wirken. Mir hunn och als Gréng am Kader vun der Territorialreform eng ganz Rei vun esou Virschlëi ausgeschafft.

Vläicht kréie mer jo duerch déi nei ORTen eng nei Dynamik a méi eng professionell Struktur, esou wéi dat schonn an der sougenannter ETI-Etüd vun ’92 suggéiert gouf, fir dass méi eng koordinéiert Infrastrukturpolitik am Tourismus entstoe kann. Da mussen awer déi Regiounen, déi do zesummengestallt ginn, och mat aneren IVL-Regiounen, och wou aner Regiounen nach iwwerall sinn, iergendwéi eng Koordinatioun hunn.

Wann déi koordinéiert Infrastrukturpolitik bis steet, ass duerno d’Ëmsetzung vun deene sëllege Projeten op jidde Fall méi einfach an och méi séier transparent a gerecht. Et ass schonn ustrengend, fir sech dat néidegt Gehéier an Ärem Ministère ze verschafen.

Esou ass zum Beispill am Rapport vum Här Clement ze liesen, dass d’Réimecher Schwämm eng Infrastructure touristique régionale soll sinn. Ech musslech awer soen, dass dat an der Praxis net esou einfach ass. Hätte mer de Projet no Lëtzebuenger Normen a Praxis gebaut, wäere mer haut nach ëmmer nëmme bei enger Subventioun vu 25%. Dobäi ass d’Subventioun vum Tourismus a vum Sport zesummegeluecht ginn. Eng Schwämm wëllen ze sanéieren, déi e regionale Charakter soll hunn, ass ënner esou Konditiounen net méiglech.

Gläichzäiteg gëtt awer verlaangt, nach weider touristesch Infrastrukturen ze realiséieren, déi dann deels souguer gekoppelt betruecht a behandelt ginn. Esou och erm de Fall vu Réimech, wou mir säit Jore gedrängt ginn, e Camping ze realiséieren, wëssend, dass fir esou Infrastrukturen et nëmme maximal 15% Subventioun ginn. Bei der momentaner Finanzsituatioun vun de Gemengen ass dat also kaum virstellbar.

Dëst si Beispiller, déi ech ganz konkret déi lescht zwee Joer materliefht hunn an déi vill onnéideg Zäit an Usproch geholl hunn; Zäit, déi ech léiwer fir aner Projeten investéiert hätt. Dëst ass awer keen Eenzelfall. Ähnlech Beispiller krut ech vun anere Kolleegen erzielt.

Dës Problemer kann een awer nëmmen dann an de Grëff kréien, natierlech virausgesat, et wëllt een eppes do änneren, duerch méi eng koordinéiert Infrastrukturpolitik. De Plan quinquennal ass deemno d’wichtegst Instrument, wann d’Ëmsetzung duerno ka schnell, effizient, transparent an no novollzéibare Kritären erfollegen.

Wéi scho gesot, Här Minister, Dir sidd net do eleng gefuerdert, och déi sëllege Lokalpolitiker sinn hei opgeruff, méi déi regional Zesummenaarbecht unzestriewen.

Madame Presidentin, Dir Dammen an Dir Hären, vläicht nach e puer Wuert zur Kritik, déi d’Chambre de Commerce - net fir d’éischt - bei esou engem Plan quinquennal an hirem Avis formuléiert huet. Eng Kritik nämlech, déi duerch d’Subventionspolitik fir d’öffentlech Hand, besonnesch fir d’Gemengen, d’Syndikater an esou weider, ausgeléist gëtt an als eng Diskriminatioun op d’Käschte vun der privater Touristebbranche ugesi gëtt. Eng Kritik, déi ech wuel novollzéie kann, déi een awer net ganz kann deelen.

Et gëtt sécherlech Projeten, wou d’Grenz net ëmmer esou einfach ze zéien ass. Ech mengen awer, dass de gréissten Deel vun den Investitiounen, déi an d’öffentlech Hand fléissen, Projete sinn, déi vu privater Säit net hätten oder och kaum hätte kënnen realiséiert ginn.

Ech kommen dofir schonn zum Schluss vu mengen Ausféierungen iwwer e Gesetz, wat de Plein am Tourismus an den nächste Jore wäert maachen. Mir wënschen dem Minister awer beim Fëlle vun deene sëllege hongregen Touristebäich, woubäi der och eng ganz Rei, wéi scho gesot, heibanne setzen, méi eng cibléiert, novollzéibar a glécklech Händchen.

Ech soenlech Merci fir d’Nolauschteren.

» **Plusieurs voix.** - Très bien!

» **Mme le Président.** - Merci, Här Kox. Den nächste Riedner ass den Här Henckes.

» **M. Jacques-Yves Henckes (ADR).** - Madame Presidentin, Dir Dammen an Dir Hären, e Plan quinquennal fir den Tourismus bedeit natierlech, dass mer elo decidéieren, nees eng etlech Suen an den Tourismus an ënnert d’Leit ze bréngen, esou dass et also vum Prinzip hier, mengen ech, wäert Eestëmmegkeet hei an der Chamber ginn, fir op dee Wee do ze goen, an ech wëll och duerfir den Accord vun der ADR zu dësem Projet prinzipiell bréngen.

Nach ass et awer och d’Geleeënheet, fir verschidden Debatten, verschidde Problemer unzeschwätzen, an een ass schonn ugeschnidde ginn, dass ass dee vum Rapport vun der Cour des Comptes. Duerfir wollt ech froen, wéi dann elo déi Situatioun evoluéiert huet.

Ech hunn esou d’Impressioun, dass déi Kritiken, déi vun der Cour des Comptes komm sinn an déi zum Beispill bemängelt hunn, dass Demanden accordéiert gi sinn, dass Subsidien accordéiert gi sinn, nodeem den Invest scho gemaach war, respektiv dass net genau kontrolléiert ginn ass, ob d’Montanten da géife korrespondéieren, dass dat natierlech formaljuristesesch an administrativ richteg ass, dass ee kontrolléiert, wéi déi Suen erausgi ginn.

Mä ech hunn awer och gemengt, dass et eng gewësse Souplesse misst ginn, fir kënnen de Leit an de Betriber ze hëllefen. Duerfir wier ech frou - wéi hei scho meng Virriednerin, d’Madame Dall’Agnol, gesot huet -, Här Minister, wann Der nach eng Kéier déi nei Aart a Weis, wéi Der elo wëllt d’Dossiere behandeln an Zukunft fir deen neie Plan quinquennal, wëllt kuerz erklären.

Déi aner Fro, déi mech beschäftigt, ass ze wëssen, wéi vill Demanden elo ufälleg sinn, déi elo kënnen an deem nächste Plan quinquennal behandelt ginn. Wéi vill müssen der zrëckgoen oder refuséiert ginn? Ass do e gewëssene Prozentsaz mat dran, deen aus budgetäre Grënn net ka geholl ginn? Oder sinn do keng Contrainten dran? Kënnen nach zousätzlech Projete kommen?

Da muss een awer och soen, dass mer u verschiddene Problemer ze kämpfen hunn an notament ons Hôtelleriebranche, an dat sinn déi Klassifizéierung vum den Hotelén.

A Frankräich an zu Lëtzebuerg hu mer Een-, Zweek-, Dräi- a Véier-Stären-Hotelén. An anere Länner gëtt et Een-, Zweek-, Dräi-, Véier- a Fënnef-Stären-Hotelén. An dat mécht relativ Konfusioun. Ech hunn héieren, dass Leit no engem Fënnef-Stären-Hotel zu Lëtzebuerg sichen. Si fanne keent. Si soen: Wéi ass dat méiglech? Datselwecht gëllt och fir Frankräich. A Frankräich huet d’Regierung elo decidéiert, fir dëst Joer och op Fënnef-Stären-Hotelén ze goen an ze kucken, dass déi Klassifizéierungen och effektiv eng Realitéit sinn an dass se periodesch kontrolléiert ginn.

Duerfir wollt ech d’Regierung froen, ob se net gewëllt ass, well mer elo ëmmer méi Länner hunn, och ronderëm ons, déi am Fënnef-Stäre-Gebitt sinn, op deem Gebitt och eng Evolutioun ze maachen an eng Astellung op fënnef Stären ze maachen. Respektiv ob se och net wëllt um europäesche Gebitt derfir intervenéieren, dass endlech sollt versicht ginn, eng europäesch Norm ze kréie fir alleguerten déi Hotelén.

Well et ass fir den Tourist relativ schwéier, fir do Differenzéierungen ze maachen, wann et vu Land zu Land aner Kritäre gëtt.

Da gesäit een, datt mer am Land natierlech Een- bis Véier-Stären-Hotelen hunn, mä ech hunn awer d'Impressioun, datt et relativ wéindeg Zweek- bis Dräi-Stären-Hotele gëtt, an et gesäit een, datt vill Leit, déi zum Beispill an der Stad esou en Hotel sichen, do keent fannen oder bal keent fannen an datt se mussen ausserhalb vun der Stad wunne goen.

Duerfir froen ech mech, ob et net opportun wier, fir ze kucken, datt och Investitiounen an der Stad Lëtzebuerg vun esou Zweek- bis Dräi-Stären-Hotele kéinte subventionéiert ginn, datt do Hëllef kéinte kommen. D'autant plus datt ee gesäit, datt de Käschtepunkt vu verschiddenen Hotelinfrastrukturen, reng de Bau, bei fënnef bis sechs Milliounen Euro läit fir zéng, 20 Kummeren. Do gesäit een, datt dat considérel Montanté sinn an datt der ëmmer méi vu Säite vun der Privatindustrie, vun der öffentlecher Hand net ze schwätzen, net méi wellen op dee Wee do goen, well d'Risqué relativ grouss sinn.

(M. Lucien Weiler reprend la Présidence)

Dat ass just eng lwwerleeung, wou ech mengen, datt d'Regierung gutt berode wier, fir dee Phenomeen an der Stad Lëtzebuerg ze kucken.

Well d'Resultat, dat gesi mer elo schonn. Net nure wéinst der Hotelinfrastuktur an der Stad, mä och wéinst där allgemenger Situatioun. No sechs Auer an der Stad Lëtzebuerg gëtt et den Ausdrock um „Couvre-feu après 18 heures“. Dat heescht, datt mer bal no 18 Auer hei an der Stad Lëtzebuerg mengen, et wier e krichsähnlechen Zoustand an et wier eng Ausgangssperr, well keen ee méi do ze fannen ass.

(Brouhaha)

An ech mengen do muss och vu Säite vun der Regierung geschwat a gekuckt ginn, wat fir eng Initiativen ee gegebenenfalls mat der Stad Lëtzebuerg kann ënnerrhuelen, fir datt mer nees den Zentrum vun der Stad beliefs kréien.

D'Gare ass vläicht beliefs, mä héchstwahrscheinlech e bësselchen ze vill...

(Hilarité)

...a mat engem Tourismus, deen net onbedéngt deen ass, deen déi meescht Leit sech hei zu Lëtzebuerg erwaarden.

(Interruptions diverses)

Ech loosse verschidden Experte vläicht herno schwätzen.

(Brouhaha et hilarité)

» M. le Président.- Kommt, mir bleiwe beim Sujet!

(Hilarité)

» M. Jacques-Yves Henckes (ADR).- Dat gesot, Här President - ech gesinn, datt Der remplacéiert gi sidd -, mengen ech, datt de Projet de loi, wéi en elo virläit, ons Zoustëmmung fënn, quitte datt mer e puer Reserven hunn, wat d'Applikabilitéit an d'Applikatioun vun de Reglementer ugeet, vun deene mer Connaissance geholl hunn, mä déi awer vläicht net haut en tant que tel bei ons als Chamber ënner onse Kompetenzen zur Debatt stinn.

Fir de Rescht wollt ech awer den Accord vun der ADR-Fraktioun zum Gesetzesprojet bréngen.

» Une voix.- Très bien!

» M. le Président.- Merci, Här Henckes.

(Interruptions diverses)

Merci, Här Jaerling. Dann ass et un der Regierung. Den Här Tourismusminister Fernand Boden huet d'Wuert.

(Brouhaha général)

» M. Fernand Boden, Ministre des Classes moyennes, du Tourisme et du Logement.- Här President, Dir Dammen an Dir Härën, mäi Merci och un de Rapporteur Lucien Clement, dee mat vill Engagement versicht huet, hei dee Fënnefjoresplang an d'Regierungspolitik gutt ze verdeedegen. Merci all deenen, déi hei intervenéiert sinn, an och alleguer deenen, déi dëse Projet stëmmen. Ech mengen, dat wären alleguer, déi heibanne sinn. Mir haten och eng konstruktiv Debatt, wéi dat ëmmer beim Tourismus de Fall ass.

Et sinn och eng Partie Froen opgeworf ginn, op déi ech wëll agoen. Ech wëll fir d'éischt nach eng kéier soen, datt dëse Fënnefjoresplang fir den Tourismus, esou wéi et hei och ënnerstrach ginn ass, an der Linn vu senge Virgänger läit. Mir hu versicht, an

deenen eenzelne Fënnefjorespläng eist Konzept ëmzesetzen, dat vun 1992 datéiert. Dat Konzept ass 2001 revidéiert ginn.

An, Här Etgen, schonn am siwente Fënnefjoresplang sinn déi Recommendatioune vum ETI fir d'éischt ëmgesat ginn, an elo, an dësem Fënnefjoresplang, ginn nach weider Recommendatioune vum ETI, op déi ech och wäert agoen, ëmgesat.

Ech muss och soen, datt dës Etüd vum ETI - an dat ass och hei schonn ervirgestrach ginn - Lëtzebuerg eng international gutt Qualitéit am Beräich vun den touristeschen Infrastrukturen attestéiert huet. Dat ass net zulescht bedéngt eben duerch d'Ëmsetzung vun deene verschiddene Fënnefjorespläng fir d'Verbesserung vun der touristescher Infrastruktur. Si hunn also net - wéi Dir gesot hutt, Här Etgen - keng Impulser ginn, mä si hu ganz wichteg Impulser ginn, fir déi touristesch Infrastruktur ze verbessern.

Ech muss och soen, Här Etgen, Dir hutt lech e bësse widdersprach: Am Ufank war alles schlecht, an op eemol hutt Der ugefangen, eng Abberzuel vu Projeten ze ernimmen, déi gutt gewiescht wieren an déi duerch d'Fënnefjorespläng realiséiert gi sinn, an zum Schluss hutt Der och gesot, mir géifen awer net esou schlecht dostoen.

Da wëll ech awer soen, da...

(Interruption)

...kënnen den Tourismusministère an deene laange Joren, wou ech d'Verantwortung hunn, an all déi vill aner Leit, déi am Tourismus kräfteg matschaffen a vill Suen a vill Zäit a vill Fräizäit engagéiert hunn, also net alles esou schlecht gemaach hunn, wéi dat emol duergestallt gëtt.

(Interruption)

Mir hunn och 2007, dat wëll ech soen, net nëmmen déi gutt Noté vum ETI nach eng kéier confirméiert kritt. Den ETI ass jo en europäescht Tourismusinstitut, wat attachéiert ass un d'Universitéit vun Tréier, wou mir och selwer Gesellschafter mat dra sinn. Do kënnst ee jo och soen, déi maachen dann heiandsdo esou Etüden, déi vläicht e bëssen ze vill favorabel sinn. Neen, och de World Economic Forum, deen 2007 124 Länner examinéiert an en Index opgestallt huet, wat d'Konkurrenzfäegkeet am Tourismus an am Reesberäich ubelaangt, attestéiert Lëtzebuerg am Total déi ausgezeechent nëngte Plaz.

Dat ass haaptsächlech doduerch bedéngt, datt mer am Beräich vun der touristescher Infrastruktur op déi sechst Plaz ënner, wéi gesot, 124 Länner komm sinn. Dëse World Economic Forum seet, datt Lëtzebuerg am Grupp vun de sougenannte Reise- und Touristikchampions niewent Länner oder hanner Länner wéi, wann ech d'Europäesch Unionen huelen, Eisträich an Däitschland op der drëtter Plaz ass. Insgesamt also, wat d'Kompetitivitéit ubelaangt am Tourismus an am Reessektor. Wann ech elo Europa huelen, ass Lëtzebuerg hannert der Schwäiz, Eisträich, Däitschland an Island op der fënnefter Plaz.

Also esou schlecht sti mer net do! Mir hu gutt Noten dofir kritt, datt mer vill Efforté gemaach hunn, fir déi touristesch Infrastruktur wesentlech ze verbessern an och aner Saache wesentlech ze verbessern, fir datt mer kënnen international konkurrenzfäeg sinn.

Ech wëll awer net verheemlechen, datt mer nach eng Rei vu Problemer hunn an datt mer et nach besser kënnen maachen. Dat ass jo och de Sënn vun deem, wat mer wëlle realiséieren. Besonnesch ass gesot ginn, am Beräich vun der touristescher Organisatioun wier nach munches ze verbessern, am Beräich vun der Formatioun an och vum Marketing. Dat si just déi dräi Beräicher, déi jo net an d'Kompetenz vun den Tourismus-Fënnefjorespläng gefall sinn. Dofir ass versicht ginn, fir lues a lues Dieren opzemaachen, fir datt mer och an deene Beräicher kënnen méi staark mat agräifen.

Den ETI hat Moossnamen an dëse Beräicher hei virgeschloen. Ech wëll nach eng kéier dorunner erënneren. Dat éischt ass d'Kreatioun vu sougenannten Offices régionaux de tourisme, den ORTen, vun deene jo eng Partie Leit hei geschwat hunn. Mir hunn déi Strukturen an de Regiounen vun den Ardennen an dem Mëllerdall, der klenger Lëtzebuerger Schwäiz, elo viru kuerzem ulafe gelooss.

Ech sinn d'accord mat deenen, déi gesot hunn, datt dat nëmmen e Succès gëtt, wann all déi Acteuren un engem Strang zéien. Dat ass och de Sënn dovun.

De Bénévolat huet ganz vill Mériten am Tourismus, e stéisst awer allze oft u seng Grenzen. Duerfir muss een ebe kucken, den Professionalismus méi Chancen ze ginn, fir datt dee Bénévolat gutt encadréiert ka ginn

duerch Professioneller, an duerfir brauch een och eng Masse critique vu Gelder. An d'ORTe sollen ebe just kucken, datt déi Masse critique vu Gelder zesummegedroe gëtt. De Ministère wäert seng Aufgab do erfëllen an eng ganz Partie Suen, oder de Gros vun de Suen doranner stiechen.

D'Gemengen, déi aus dem Norden an déi aus dem Osten, hu sech och bereet erkläert, fir Sue pro Awunner an den ORT ze stiechen. An da brauche se natierlech och Gelder vun dem Privatsektor, dee vum Tourismus profitéiert. Ech muss soen, do erwaarden ech nach e bësse méi, wéi elo um Dësch läit, mä do si mer amgaange lues a lues Modeller ze erstellen, fir datt och déi hire Bäitrag leeschten a fir datt an den ORTen eng Masse critique vu Gelder zesummekënn. Net nëmme fir Leit ze bezuelen, fir datt se sollen do schaffen, mä och fir Packagen ze maachen, fir gutt Produiten ze erstellen, déi dës Regioun, an där se täteg sinn, vermaarte kënnen an déi d'Regioun och méi attraktiv kënnen maachen.

Zweetens huet dann den ETI d'Kreatioun proposéiert, virun allem duerch dës ORTen, vu méi touristesche Produkter, déi attraktiv sinn, déi de Wënsch an Uspréch vun de Clienten entspriechen.

Drëttens huet e proposéiert, eng méi staark „unique selling proposition“ fir Lëtzebuerg ze realiséieren. Mir müssen also méi kloer ervirsträichen, wouranner mer eis vun eise Konkurrenten ënnerscheeden, wat mir am Fong vun Eemolegem, vun deem, wat „out-standing“ ass, vun deem, wat ervirsteet, unzebidden hunn.

An deem Zesammenhang wëll ech och der Madame Dall'Agnol soen, datt mer just op der Vakanzefoire dëst Joer eng nei „corporate identity“ virgestallt hunn. En neie Stand op der Foire, wou ganz vill Verrieder drop waren, déi versicht hunn, Lëtzebuerg ze verkafen, an déi nei „corporate identity“ - mengen ech - huet och vill a gudden Uklang fonnt. Et geet also drëm, am In- an am Aus-land eis op eng modern, attraktiv Aart a Weis duerzestellen an och méi nei an attraktiv Imagebroschüren ze erstellen, déi op där Foire d'ailleurs presentéiert gi sinn, an och konkret touristesch Produkter, déi attraktiv sinn, un de Mann ze bréngen.

Den Här Schank huet drop higewisen, datt mer do Nordic-Walking-Parke virgestallt hunn. Dat ass d'ailleurs eng Kreatioun vu ganz ville Partner zesummen, déi ganz interessant ass, mat där een am Aus-land werbe kann. Eis VTT-Circuiten an eis national Wanderweeër si virgestallt ginn. Et sinn extra Broschüre gemaach ginn, fir och am Aus-land op de Foiré méi e schaarft Bild vu Lëtzebuerg als Tourismusdestinatioun kënnen ze weisen.

Véiertens huet den ETI virgeschloen, den Ausbau vun der Formatioun vun dem professionellen Tourismussektor ze maachen. Dat ass ganz wichteg. Mir si ganz gutt an den Infrastrukturen. Mir hu vläicht nach Retarden an der Dëngschtleeschtung; duerfir geet et also elo drëm, d'Dëngschtleeschtung méi staark ze pousséieren. Dofir eis Initiativ Q-Label, Service Qualitéit Lëtzebuerg. Dat ass also eng Qualitéitsoffensiv am Dëngschtleeschtingsberäich, an ech wäert nach e bëssen dorobber agoen, well dat jo och ee vun den neien Akzenter vun dësem Fënnefjoresplang ass.

Et ass hei och scho gesot ginn: Eis Visioun, eist Konzept ass nach ëmmer Liewensqualitéit an Tourismusqualitéit. Dat soll ënnersträichen, datt den Tourismus a seng Infrastrukturen éischstens d'Liewensqualitéit vun de Lëtzebuerger Bierger an Awunner ka verbessern an domadder och d'Akzeptanz vun hinne vum Phenomeen Tourismus, dee jo och heiandsdo gewëssen Nodeeler mat sech bréngt fir si.

Zweetens soll dat awer och drop hiweisen, datt mer wellen eisen Tourismus qualitëitsorientéiert gestalten, nohaltig gestalten, an datt duerch déi Gestaltung och déi Touristen, déi bei eis kommen, en Deel vun der Liewensqualitéit, déi zu Lëtzebuerg herrscht, kënnen materliewen. Och dat ass eppes, wat ganz vill Leit op Lëtzebuerg zitt.

Fir vläicht op e puer Zuelen anzegoen: Den Tourismus ass weltwäit e formidabele wirtschaftleche Sektor. 2005 sinn 808 Milliounen Arrivéee vun Touristen ausgemaach ginn, an déi hu 682 Milliounen US-Dollar generéiert. Deen Trend geet weider. Den Tourismus ass e Wuesstumssektor. Hei an Europa wissst en net gradesou schnell wéi weltwäit, mä et gesäit een awer, datt an Europa den Tourismussektor staark um Wuessen ass.

Ech wëll och do just eng Zuel soen: 6% vun der aktiver Bevëlkerung schaffen direkt am Tourismus. Dat sinn zéng Milliounen Leit! Heiandsdo a vill ze oft gëtt den Impakt vum Tourismus fir d'Wirtschaft insgesamt an och

fir d'Beschäftegung ënnerschat. Mir mus-sen also och kucken, kompetitiv ze sinn an och hei zu Lëtzebuerg eben ze versichen, fir vun deem Wuesstum vum Tourismussektor ze profitéieren. Dat ass och an de leschte Jore geschitt.

Mir hunn zesumme mat der WTTC geschafft. Dat ass de World Travel and Tourism Council, en internationale Gremium, deen am Fong den Impakt vum Tourismus fir déi verschidde Länner miesst. Mir hunn deenen den Optrag ginn, fir zu Lëtzebuerg ze moossen: Wat ass de Wäert vun der Tourismusindustrie? Dat heescht, nëmmen dat, wat direkt vum Tourismus ofhängeg ass; Hébergement a Restauratioun. Do dréit d'Tourismusindustrie 2,9% zum PIB bäi hei am Land.

Wa mer awer elo d'Tourismusekonomie huelen - dat ass dat, wat direkt an indirekt vum Tourismus ofhängeg ass -, da mécht dat net nëmme méi 2,9% vum PIB aus, mä 9,4% vum PIB gëtt duerch den Tourismus generéiert am Tourismussektor selwer an och an anere Wirtschaftssektoren, déi vum Tourismusphenomeen profitéieren.

De WTTC huet och eng Perspektiv gemaach: Wéi kann dat sech zu Lëtzebuerg entwéckelen? Déi ass ganz positiv. Um Horizont 2016, hu se gesot, kéint d'Tourismusekonomie - also dat Gesamt - bis zu 16,3% vum Emploi duerstellen an 10,8% vum PIB. Also, do hu mer eng Chance, déi mer mus-sen notzen.

Dëse Fënnefjoresplang soll jo am Fong de Kader setzen, datt mer déi Chancen och kënnen optimal notzen, eis Stärkten aus-spillen, besonnesch am Kongress- an Incentive-Tourismus de Kongress- a Geschäftstourismus ass e Sektor, deen iwwerall um Wuessen ass - an do hu mer vill Trëmp, vun deene mer kënnen profitéieren -, an awer och an deem méi allgemenge Fräizäittourismus.

De staarke Wuesstum wäert et ouni Weideres erlaben, datt nei Aarbechtsplaze geschafe ginn, datt aner Wirtschaftszweigen och kënnen vum Tourismus profitéieren, an zweetens kann den Tourismus och e regional wirtschaftlechen Ausgläich tëschent Stad a Land erreechen. Den Här Schank, dee jo och déi Problematik vum Tourismus am ländleche Raum opgeworf huet, weess, datt mir als Tourismusministère ons der Problematik bewosst si vum sougenannte Stad-Land-Gefälle am Tourismus.

Mir si gewëllt, deem Trend entgéintzesteieren, zesumme mat den ORTen aus dem Mëllerdall, der klenger Lëtzebuerger Schwäiz, an aus den Ardennen. Zesumme mat deene si mer amgaangen, eng Etüd ze maachen, fir konkret Solutiounen a konkret Denkestëss ze kréien, wéi mer dem sougenannte Fräizäittourismus am ländleche Raum nees op d'Spréng kënnen hëllefen. Dës Etüd soll eng konkret Analys maache vun den Erwaardunge vum Client, vun deem senge Wënsch, a konkret Aktiounen virschloen, wéi mer deene Wënsch an deenen Demandé vum Client kënnen besser Rechnung droen.

Am Fräizäittourismus am ländleche Raum spillt natierlech de Familljentourismus eng ganz wichteg Roll. D'Famillje sinn e groussen Undeel vun de Clienten am ländleche Raum. Mir müssen also och kucken, fir de geziilte Wënsch vun de Famillje kënnen besser Rechnung ze droen. Déi Ureegung, déi gemaach ginn ass, ze kucken, ob een net kéint iwwert d'Schafung vun engem Familljegütesiegel fir Hébergementsstrukturen nodenken, ass ganz interessant a kann och am Kader vun der Etüd ganz sécher analyséiert ginn.

Et ass e puermol op d'Enveloppe budgétaire higewise ginn. Mir hunn effektiv déi kéier e gudde Sprong gemaach. Mir kréie 34% bäi, éischstens emol, well mer nach e gewëssenen lwwerhang hu vu Projete vum siwente Fënnefjoresplang, a well och e puer nei gréisser Projete geplangt sinn am Kader vun deem aachte Fënnefjoresplang. Ech si ganz frou doriwwer. Ech sinn och frou, datt Dir dës Meenung deelt. Mir wäerten och weiderhin de Privatsektor staark ënnerstëtzen an encouragéieren ze moderniséieren, well mer festgestallt hunn, datt iwwerall do, wou erneiert ginn ass, wou nei Infrastrukture geschaf gi sinn, wou Hotelen ausgebaut goufen, e Wellnesssektor ugebaut hunn, och gutt Resultater gemaach ginn.

Ech wëll och deenejéinegen, déi gemengt hunn, d'PMEE kéinten nach méi staark ënnerstëtzt ginn, soen, datt mir hei am Land déi stäerksten Ënnerstëtzung fir d'PMEEen an dësem Beräich, besonnesch an der Hôtellerie, ubidden.

Et muss een och kucken: Wou waren déi finanziell Schwéierpunkte vum siwente Fënnefjoresplang? Dat wäert am aachten d'nämlecht bleiwen. Iwwer 20% vun der Gesamtveloppe sinn am siwente Fënnefjoresplang an d'Hôtellerie gestach ginn. Dat ënnersträicht och den Investitiounswëlle vun eisen Hotelieren, dat ass och iwwerliwenswichtig.

Mir gesinn, datt am ländleche Raum vill kleng Hotele verschwannen. Déi Better, déi verschwannen, mussen ersat ginn duerch gréisser Strukturen, wou bestehend Hotele sech vergrësseren, sech moderniséieren oder och neier geschafe ginn. Duerfir wäerte mer och am Kader vum aachte Fënnefjoresplang déi Investitiounen an déi Hotelinfrastruktur weider ganz staark ënnerstëtzen.

15% vun de Sue sinn an Infrastrukturmoossname gaangen, déi vu Syndicat-d'initiative geschafe goufen. Do gesäit een och: D'Roll vun de Syndicat-d'initiatives ass net nëmmen, fir Animatioun an Aktivitéiten ze maachen, mä si investéieren och ganz vill an Infrastrukturen. Och dat soll weider ënnerstëtzt ginn.

Mä iwwer 55% vun der Enveloppe ass u Gemenge gaangen, déi an touristesch Projeten investéiert hunn. Also iwwer 55%! Duerfir wëll ech och deenen ze bedenke ginn - d'Chambre de Commerce awer och eenzel Deputéierten hunn dat, wann net haut hei, mä op anere Plaze gemaach -, déi gemengt hunn, den Taux d'intervention fir den öffentleche Secteur misst gläichgestallt gi mat deem vum Privatsektor.

Den Här Clement huet drop higewisen, datt de Privatsektor maximal mat 15% duerf duerch d'Bréisseler Bestëmmunge subventionéiert ginn. Wa mir de Gemengen och nëmme 15% géife subventionéieren, fir Piscinnen ze bauen, fir Muséeeën ze schafen, fir d'Duerfverschönerung, fir Centre-touristiques, fir Centre-créatives, Parken, Piste-cyclables ze maachen, da géifen déi net gemaach ginn. Or, déi Investitiounen droen e wesentleche Bäitrag zur Attraktivitéit vu Lëtzebuerg als Tourismusdestination. Duerfir ass et wesentlech, datt mer fir déi doten Infrastrukturen, déi net vum private Sektor géife gemaach ginn, awer och kënnen weiderhi méi héich Subventiounen ginn, sou wéi dat och bis elo de Fall war.

Vläicht e puer Wuert zur Prozedur, den Här Kox huet déi Problematik ugeschwat, éischstens emol: Wéi kommen déi Projeten, déi d'Gemenge maachen, op déi Lëscht? An: Wéi gëtt dat gehandhaabt?

Laang iert de Fënnefjoresplang kënnt, Här Kox, ginn d'Gemengen ugeschriwwen. Si ginn op d'mannst zweemol ugeschriwwen. Si solle sech Gedanke maachen - an annerhallwem Joer kéim en neie Fënnefjoresplang -, wat si sech wëilten u Projete realiséieren, datt se och Zäit hunn, dat mam Gemengerot ze diskutéieren, a mat Bureau-d'études eventuell zesummenzekommen dowéinst. Da kënnt dat eran, an da kënnt e Comité interministériel, an deem all déi concernéiert Ministère dra vertritt sinn. Deen examinéiert dat. Do huet den Tourismusministère eng Koordinatiounsroll. Opgrond vun deem sengem Avis gëtt dann e Règlement grand-ducal ausgeschafft, dee vun der Regierung muss guttgeheescht ginn.

Do ass absolut Transparenz. A wann heiansdo monéiert gëtt, gewësse virgesinne Projete géifen net realiséiert ginn - d'Ma-

dame Dall'Agnol huet dat jo vum Rapport vun der Cour des Comptes zitéiert - esou hunn ech do awer och déi Erklärung gi gehat, datt, wann eng Gemeng entre-temps Gemengerotswahlen hat, oder de Schafferot changéiert, oder si huet finanziell aner Prioritéiten, wéi si se virdrun hat, da realiséiert se dee Projet eventuell net, deen um Fënnefjoresplang steet. Duerfir kann nun awer net den Tourismusminister.

Et ass jo och ganz kloer, datt dee Règlement grand-ducal kann ugepasst ginn. Dat heescht, wann e Projet ewechfällt, kann een aneren, dee virdru vläicht net geholl ginn ass, amplaz kommen. Do ass also eng Méiglechkeet, datt mer flexibel sinn. Do ginn der also net vun Ufank un eliminéiert à tout jamais. Mä ech verstinn heiansdo, datt eben och aner Zwäng an enger Gemeng kommen, datt se net all déi Projeten, déi se vläicht wëlles haten ze realiséieren, och realiséieren.

Da kënnt den Hunger heiansdo derbäi, vun deem Dir geschwat hutt, Här Kox. Do ass Réimech kee gutt Beispill. Dir hutt mer zwou Saache reprochéiert: Réimech géif gedirengelt ginn, si missten e Camping maachen. Réimech hat e Camping. Si si bei mech komm, ob ech bereet wär, datt se dee Camping géife verschwannen doen an do e Parking maachen. Et wier wichtig, datt se niewendrun am Zentrum...

» **Une voix.** - Abee jo!

(Interruption)

» **M. Fernand Boden, Ministre des Classes moyennes, du Tourisme et du Logement.** - ...kënnten eng zentral Plaz maachen, déi d'Leit géif an den Zentrum unzéien. Ech war averstanen ënnert der Maßgab, datt awer e Camping géif erëmkommen. Vläicht ënner anerer Form; e Campingcars-Camping eventuell, dat ass mir och nach egal. Ech mengen also net, datt ech se direngelen. Dat ass am Fong e Versprechen, dat d'Gemeng Réimech gemaach huet. Ech war nëmmen ënnert där Konditioun d'accord, fir déi Parkplazen ze subventionéieren, fir och ze hëllefen, datt déi Plaz konnt realiséiert ginn.

An dann ass d'Saach vun der Piscine. Zu Réimech gëtt et d'Patinoire an d'Piscine. Do hunn ech e Projet gehat fir d'Patinoire; fir d'éischt sollt se realiséiert ginn; da sollt se erëm net méi realiséiert ginn; da sollt se erëm anescht realiséiert ginn. Dat mécht d'Planung net einfach fir den Tourismusminister. Bei der Piscine, mengen ech, ass den Devis verduebelt ginn, Här Kox. Dir hutt mer selwer zougestanen, datt se vill ze vill deier wär. Ech hu jo gesot: Ech ginn lech e gewëssene Prozentsaz bis zu engem Plafong an Dir sollt kucken, datt dee Projet méi bëlleg gëtt.

Mir hunn och eng Etüd maache gelooss vun engem Expert, dee gesot huet: Déi Réimecher Piscine ass vill ze vill deier. Déi muss anescht gemaach ginn. Wat ass d'Resultat? Se gëtt elo méi bëlleg, Här Kox. Also, ech hunn lech gehollef Suen ze spueren, andeems ech Oplage gemaach hunn. Duerfir mengen ech schonn, datt ee muss heiansdo den Hunger vu gewësse Leit bremsen. Dat ass ganz richtig!

Gutt. Ech si frou, datt déi Réimecher Projeten, déi se fir dëse Fënnefjoresplang virgeschloen hunn, drop komm sinn. Ech sinn dervun ausgaangen, datt déi Projete vu Réimech gutt iwwerluecht wäeren, datt Der net einfach esou Projeten elo dropgesat hutt.

(Interruption)

Duerfir huet dee Groupe interministériel gemengt, déi Projeten, déi vu Réimech komm wäeren, wäeren akzeptabel a kënnten dropkommen. An ech hoffen, datt se och realiséiert ginn.

D'Schwéierpunkte vum aachte Fënnefjoresplang - dorop hunn ech nach eng kéier higewisen -: Kongress- a Geschäftstourismus, Tourismus am ländleche Raum, Kulturtourismus a Bannentourismus. Mir wäerte

konzentriert an déi véier Geschäftssailen do investéieren.

D'Neierungen, déi kommen, sinn zum Deel schonn ernimmt ginn. Ech wëll just nach eng kéier soen, datt mer wëlle versichen an der Hôtellerie eng Ouverture ze maache fir en neien Typ vun Hotel, deen ëmmer méi besicht gëtt. Dat ass den „art and design“-Hotel. Dee ka méi en héijen Taux kréien, gradesou wéi dat zum Beispill fir e Wellness- oder fir e Sporthotel de Fall ass. Wann en Hotel geziilt an de Sport oder an de Wellness investéiert, da ginn do ganz genee Kritäre festgeluecht, wat do geschéie muss; oder och elo an „art and design“-Hotelen. Da kann een e méi héijen Taux kréien, wéi wann een einfach nëmmen Zëmmer renovéiert an déi moderniséiert. Dat ass e Créneau, dee sech entwéckelt, a mir wollten deem Créneau och hei zu Lëtzebuerg eng Chance ginn.

Dann ass d'Servicequalität e wichtegt neit Element an dësem Fënnefjoresplang. Mir wëlle versichen, fir d'Déngschtleeschung ze verbesseren. Mir hunn also do, wéi gesot, dee Schwäizer System iwwerholl, dee sech bewäert huet, fir eben och d'Qualitéit an de Betriber ze verbesseren. Den Här Schank huet driwwer geschwat; ech wëll also net an den Detail goen.

Mä wat mech impressionnéiert huet, dat ass, datt schonn an deene puer Méint, wou dat elo ugelaf ass, iwwer 120 Leit bereet waren, eng Formation fir déi éischt Stuf vun deem Q-Label do matzemaachen. Dat sinn d'Multiplicateurs. Déijéineg, déi do eng Formation kréien, déi sollen an hirem Betrib derfir suergen, datt d'Qualitéitsgedanken an -denken an deem Betrib sech méi breetmaachen. Dono gi Mystery-Checké gemaach, da kréie se déi zweet Stuf. An der drëtter Stuf kënnen se dann och eng ISO-Zertifizierung kréien.

(Coups de cloche de la Présidence)

» **M. le Président.** - Här Minister, ech wëll lech opmierksam maachen, dass Der wierklech muss zum Schluss kommen. Dir sidd schonn dräi Minutten iwwert d'Zäit.

(Brouhaha général)

Jo, Här Wagner, ech si gär bereet, de Minister soulaang schwätzen ze loossen, wéi hie wëllt, mä Dir haalt och ëmmer drop, dass d'Zäiten agehale ginn. Ech halen och Är Zäiten an.

» **M. Carlo Wagner (DP).** - Mä haut schwätzt de Minister esou gären.

» **M. le Président.** - Jo. Kommt!

» **M. Fernand Boden, Ministre des Classes moyennes, du Tourisme et du Logement.** - Merci, Här President. Ech maachen an zwou Minutte Schluss.

» **M. le Président.** - Jo.

» **M. Fernand Boden, Ministre des Classes moyennes, du Tourisme et du Logement.** - Merci, Här President. Ech maachen an zwou Minutte Schluss.

Am Campingssektor kënnt och eng wesentlech Neierung. Mir hu festgestallt, datt de Locatif am Camping ëmmer méi wichtig gëtt, datt ëmmer méi Leit wëllen dovunner profitéieren. Dee war bis elo net subventionabel. Duerfir gesi mer elo vir, datt deen och an Zukunft subventionabel ass, an datt am Kader vum Tourisme de passage, dee muss 75% vum Camping duerstellen, och 25% kënnen locatif sinn. Dat hëlleft de Campingen, datt se zum Beispill och kënnen Gäschter empfänken, déi wëllen an e Mobilhome kommen, déi wëllen an e Chalet goen, deen awer muss fir den Tourisme de passage zur Verfügung stoen. Et duerfen also net Leit sinn, déi permanent doranner wunnen.

An der Hôtellerie wëllt ech nach eng kéier drop hiweisen, datt d'Reglement kloer Kritäre festleet, fir datt een iwwerhaapt gehollef kritt. Et kritt net jiddfer Hotel gehollef, deen eppes investéiert, mä do muss e kloer Kritären, déi am Règlement festgehalte gi

sinn, erfëllt sinn. Duerfir mengen ech, datt mer am Tourismus grouss Transparenz hunn. Dat huet d'Comexbu och esou akzeptéiert an honoréiert. Dat heescht, dat, wat d'Cour des Comptes gesot huet, ass am Fong vun der Comexbu herno als net richtig erkannt ginn. Et ass net alles, wat si gesot hunn, richtig gewiescht. Besonnesch d'Transparenz am Tourismus ass méi grouss, wéi a munch anere Secteuren.

Voilà! Da soen ech lech alleguer finalement nach eng kéier Merci fir Är konstruktiv Ureegungen. Mir wäerte versichen, déi esou gutt wéi méiglech zur Kenntnis ze huelen an ëmzesetze mat allen Acteuren. Merci nach eng kéier fir déi grouss Zoustëmmung fir dëse Projet.

» **M. le Président.** - Merci, Här Minister. Mir kommen zum Vote vum Projet de loi.

(Interruption)

Pardon?

» **Mme Claudia Dall'Agnol (LSAP).** - Ech hat just virdrun e fuerchtbare Faux pas gemaach, fir deen ech mech offiziell wëll entschëllegen. Ech hat vergiess dem Rapporteur Merci ze soen. Dat wëll ech nohuelen.

» **Plusieurs voix.** - Aaahhh!

» **M. le Président.** - Kommt, elo hale mer eis net méi laang op. Elo komme mer zum Vote.

Vote sur l'ensemble du projet de loi et dispense du second vote constitutionnel

De Projet de loi 5748 ass ugehall mat 58 Jostëmmen, bei kenger Nee-Stëmm a kenger Abstentioun.

Ont voté oui: Mmes Sylvie Andrich-Duval (par M. Marcel Oberweis), Nancy Arendt (par M. Laurent Mosar), M. Lucien Clement, Mmes Christine Doerner (par Mme Martine Stein-Mergen), Marie-Josée Frank, Marie-Thérèse Gantenbein-Koullen (par Mme Françoise Hetto-Gaasch), MM. Marcel Glesener (par M. Lucien Clement), Norbert Hauptert, Mme Françoise Hetto-Gaasch, MM. Ali Kaes, Paul-Henri Meyers, Laurent Mosar, Marcel Oberweis, Gilles Roth, Patrick Santer, Marcel Sauber, Jean-Paul Schaaf, Marco Schank, Mme Martine Stein-Mergen, MM. Lucien Thiel, Lucien Weiler et Michel Wolter (par M. Paul-Henri Meyers);

MM. Marc Angel, Alex Bodry (par M. John Castegnaro), John Castegnaro, Mme Claudia Dall'Agnol, M. Fernand Diederich, Mme Lydie Err (par M. Roger Negri), MM. Ben Fayot, Jean-Pierre Klein, Mme Lydia Mutsch (par M. Roland Schreiner), MM. Roger Negri, Jos Scheuer (par Mme Claudia Dall'Agnol), Romain Schneider (par M. Marc Angel), Roland Schreiner et Mme Vera Spautz;

MM. Eugène Berger, Xavier Bettel, Mme Anne Brasseur (par M. Xavier Bettel), M. Fernand Etgen, Mme Colette Flesch, MM. Charles Goerens (par M. Fernand Etgen), Paul Helming, Alexandre Krieps (par M. Carlo Wagner), Claude Meisch (par Mme Colette Flesch) et Carlo Wagner;

MM. Claude Adam, François Bausch (par M. Félix Braz), Félix Braz, Camille Gira (par M. Claude Adam), Jean Huss, Henri Kox et Mme Viviane Loschetter (par M. Henri Kox);

MM. Gast Gibéryen, Jacques-Yves Henckes, Jean-Pierre Koepp (par M. Gast Gibéryen) et Robert Mehlen;

M. Aly Jaerling.

Gëtt d'Chamber d'Dispens vum zweete Vote constitutionnel?

(Assentiment)

Dann ass et esou décidéiert.

Domat, Dir Dammen an Dir Hären, si mer um Enn vun eisen Aarbechten ukomm.

D'Sitzung ass opgehuewen.

(Fin de la séance publique à 19.01 heures)



Chambre
des Députés
L U X E M B O U R G

d'Chamber online op
www.chd.lu